

## Die Schmarutzelasch

Schulzeit – frieher so wie heit –  
is nit fa jedes Kind e Plässir.  
Unn so war´s domols aach mit mir.  
Als notwennisches Iwwel honn isch´s emfunn.  
Wie aarisch long is doch die Stunn,  
wenn´s Thema ääm nit intressiert!  
Uff äämol hat ma Luschd vaschpiert  
irschendebbes ohnzeshdelle:  
Mid dem Gummische Babbier ze schnelle  
odda die Schirzebännele vumm Vordermonn  
ohnzebinne on da Bonk hinnedrohn.  
Iwwabaabt – vor mir hat e Schdrebasch gehuckt,  
noh dem hat kaum jemond aus da Klass geguckt.  
Hat enns mol ebbes falsch gemacht,  
hat das doofe Gänsje häämisch gelacht.  
Isch honn dassell nit kinne vaknuse.  
Es hat´s vaschdonn mit da Lehring ze schmuse.  
De Iwwaeifer hat bei dem Berzelbohm geschlah:  
Es haddem Freilein die Tasch getrah;  
unn beileifisch hat´s donn alles vaklatschd  
unn iwwa sei Mitschielerinne getratschd.  
Die Schmarutzelasch! Wie Schmeersääf honn isch´s gefress.  
Es hat direkt vor mir in de Bonk gesess.  
Unn schunn deshalb war´s mir e Hinnanis:  
Wenn´s sei Knause hat zerickgeschmiss,  
sinn sei longe Birschde jedesmoh  
iwwa mei Scheenschreibheft gefloh.  
Es Freilein hat das nit gesiehn –  
awwer mei gudd Not - die war hin.  
Das Luder hat donn schadefroh gelacht  
Unn sisch noch luschdisch iwwa misch gemacht.  
Äänes scheene Dachs, sei blonde Hoor ware gezobbt,  
honn isch die Schwänz ins Tinfass gestobbd.  
Do war was los! Es hat firscherlich  
no da Lehring geruf, gebrilld und gekrisch.  
Fa misch hat´s nadierlich ebbes abgesetzt.  
Isch honnem fa die Paus gewetzt.  
Wenn´s nur nit so ohrschärisch wär gewähn,  
do hädd isch em mol ohnstännisch genn.  
so honn isch em nur ään geschmeeert – klip, klap –  
unn gedenkt: „Die do holld dir kenn Dokda meh ab.“  
Die Zuschauerzahl ringserum war nit klään.  
Awwer wie die Lehring gefroht hat, wer debei gewähn,  
war´s mucksmeisjeschdill im gonze Saal.  
So honn mir allegaa zesomme gehall.  
Isch bin donn, wie so alles war erum,  
uff das Katzebänksche kumm.  
Gonz allään honn isch dort gesitzt

Unn iwwa meina Schdrofaawedd geschwitzt.  
War ma bei Schulschluss nit ferdisch grad,  
hat ma aach noch Nohsitze gehadd.  
Unn donn erschd dehemm – was fa e Qual -  
mei Eldre honn immer em Lehrer beigehall.  
Mei Wut is dodursch nit klääner wohr.  
Isch honn´s dem hinnalischdische Schdribsel geschwor:  
Bei da erschd beschd Gelejhää, das is gewiss,  
stell isch em es Klitzje, dasses falld uff die Schniss!  
Isch bin nimmeh dezu kumm, isch wääß nit, warum.  
Denn uff äämol war´s vaschwunn aus da Klass.  
Kääner hat gewusst, warum, wieso odda dursch was.

*Helene Keller*